

**Motorcykelinik eqqusseqqusaannginnerup atorunnaarsinneqarnissaanut
naalakkersuisut sulissuteqarnissaanut Inatsisartut aalajangiiffigisassaattut siunnersuut**

pillugu

Inatsisinut Ataatsimiititaliap

ISUMALIUTISSIISSUTAA

Siunnersuutip aappassaaneerneqarneranut saqqummiunneqartoq

Suliarinninnermini Inatsisinut Ataatsimiititaliap ukuninnga inuttaqarpoq:

Inatsisartunut ilaasortaq Isak Hammond, Inuit Ataqtigiit, siulittaasoq
Inatsisartunut ilaasortaq Andreas Uldum, Demokraatit, siulittaasup tullia
Inatsisartunut ilaasortaq Kristian Jeremiassen, Siumut
Inatsisartunut ilaasortaq Storm Ludvigsen, Inuit Ataqtigiit
Inatsisartunut sinniisoq Andersine H. Kristiansen, Siumut, ataatsimiititaliamut
ilaasortaagallartoq

Inatsisit atuuttut inississimanerat

Kalaallit Nunaannut 1. juli 1980-ip kingorna motorcykelit eqqunneqaqqusaanngillat, taamatuttaaq sananeqaqqusaanatik. Tamanna pivoq motorcykelit eqqunneqaqqusaannginnerat sananeqaqqusaannginnerallu pillugu Kalaallit Nunaannut inatsimmi 14. maj 1980-imi atuutilersumi.

Motorcykelit inatsisip atuutilertera sioqqullugu eqqussat, inatsimmik eqqorneqanngillat. Taamaammatt motorcykelit 1. juli 1980 sioqqullugu eqqunneqartut piginissaat atornissaallu inerteqqutaanani.

Tamanna tunngaviuvoq Inatsisartut inatsisaanni qamutit motorillit akileraarutaannut tunngasumi, motorcykelinut tunngasumik qamutit motorillit akileraarutaannik aalajangersagaqarmat.

Kalaallit Nunaanni angallannermut inatsimmi arlalinnik aalajangersagaqarpoq motorcykelinik ingerlatsinermut tunngasunik, soorluttaaq Kalaallit Nunaanni¹ qamutit iluarsartuunnerat pisatsersuutaallu pillugit nalunaarummi atuuttumi motorcykelinut tunngasumik immikkoortoqartoq.

Kalaallit Nunaanni qamutit motorillit nalunaarsugaanissaannik nalunaarummi atuuttumi

¹ Nalunaarut nr. 141 27. marts 1979-meersoq Kalaallit Nunaanni qamutit iluarsartuunnerat pisatsersuutaallu pillugit nalunaarut. allanngugaq uuminnga Nalunaarut nr. 1077 10. november 2008-meersoq Kalaallit Nunaanni qamutit iluarsartuunnerat pisatsersuutaallu pillugit nalunaarut.

aalajangersagaqarpoq qamut motorilik nalunaarsorneqarsimassasoq normulernerneqarsimassallunilu aammalu qamut isumannaatsuunngippat, normulertia arsaarinnissutigineqassalluni. Nalunaarummi² tamanna ersarippoq, motorcykelinut aalajangersakkat taakku aamma atuuttut.

Kiisalu motorcykelinik³ ingerlatsisinnaanermut allagartat uppersaatit pillugit Kalaallit Nunaanni politimesteri nalunaarummik atuutsitsilernikuvoq.

Motorcykelinik eqqussinermik inerteqquteqarnerup atuuttup tunuliaqutaa

Motorcykelinik ingerlatsisut amerlasuutigut sukkassusissamik killiliussaq nalinginnaasoq 40 km/t ataqqinagulu maleruarneq ajormassuk, sukkavallaamik soqqusaatsumillu ingerlallutik imminnik angallattunillu allanik ulorianartorsiortitsisarneri, inatsimmut oqaaseqaatini inerteqquteqalernermut patsisigitinneqarpoq.

Inatsisip tunuliaqutaanut aamma ilaavoq, 1978-imi ukiakkut ataatsimiinnermi, Landsrådimut ilaasortap Niels Carlo Heilmannip motorcykelit angisuut eqqunneqartarnerinik inerteqquteqalernissamik siunnersuutaa, Landsrådip eqqartuilluni kaammattuutaa malillugu inatsisissatut siunnersuut saqqummiunneqarpoq. Niels Carlo Heilmannip siunnersuutiminut illiutitut oqaatigai, motorcykelit nunami maani aqqusinernut taamak naatsigisunut tulluannigisut taamaallaat pinnguaatitut atortut iluaqusersuinatik pisariaqanngikkaluamik nipitoqalutik unnuakkut atornerqartarneri. Kiisalu Niels Carlo Heilmannip tikkuarpaa, inuusuttut arlaqaqisut Kalaallit Nunaanni motorcykelinik perlataarnikkut inuunerminnik annaasaqartareersut.

Ukiuni 1970-imiik 76-imut katillugit inuit 29-it motorcykelinik ajutoornerup kingunerisaanik toqusimapput. Piffissami tassani nunami maani motorcykelit amerlassutsimikkut 43-ut 70-illu akornanni nikerarsimapput.

Eqqussisinnaanermik inerteqquteqalernerup malittuanik Kalaallit Nunaanni aqqusinertigut angallanermut inatsit allannngortillugu motorcykelinik ingerlatsisinnaaneq inerteqqutinngortinnissaa piffissami aggersumi pissusissamisuussasoq, inatsimmut nassuiaammi oqaatigineqarpoq.

Kisianni kingunerisaanik inerteqqummik taamaattumik atuutsitsilertoqanngilaq.

Siunnersuut

Siunnersuutip motorcykelinik eqqussisinnaanermik inerteqquteqarneq atuuttoq atorunnaarsinniarlugu sulissuteqarnissamik Naalakkersuisut pisussaaffilerpai. Siunnersuut atuuttussanngorlugu aalajangiunneqassappat taava imaattoqassaaq, Naalakkersuisut danskillu naalakkersuisuisa akornanni, inatsisip 14. maj 1980-imeersup motorcykelit

² Nalunaarut nr. 187 19. maj 1980-imeersooq Kalaallit Nunaanni qamutit motorillit nalunaarsugaanerannik nalunaarutit allannngortinneqarneranik nalunaarummik aalajangigaavoq motorcykelit 30. juni 1980-ip kingornatigut Kalaallit Nunaannut eqqunneqartut imaluunniit tassani sananeqartut taamaattut nalunaarsorneqarsinnaan-ngillat.

³ Nalunaarut nr. 787 18. oktober 1999-imeersooq. Motorcykelinik ingerlatsisinnaanermut allagartat uppersaatit pillugit politiit nalunaarutaat.

eqqunneqaqqusaannginnerat sananeqaqqusaannginnerallu pillugu Kalaallit Nunaannut inatsit atorunnaartinnissaa (allanngornissaaluunniit) anguniarlugu isumaqatigiinniutinik aallartitsinissaat pisariaqassaaq.

Inatsimmik atuukkunnaartitsineq (allannguinerluunniit) Folketingip atuuttussanngorlugu aalajangiiffigissagaa piumasaqaataavoq.

Inatsimmik atuukkunnaartitsineq (allannguinerluunniit), Naalagaaffiup inatsisaanik allamik allannguisariaqarnermik kinguneqassaaq.

Taamaalilluni nalunaarut nr. 187 19. maj 1980-imeersoq Kalaallit Nunaanni qamutit motorillit nalunaarsugaanerannik nalunaarutip allanngortinneqarneranik nalunaarutip atuukkunnaarnissaa pisariaqassaaq, motorcykelit 30. juni 1980-ip kingornatigut Kalaallit Nunaannut eqqunneqartut imaluunniit tassani sananeqartut taamaattut nalunaarsorneqarsinnaannginnerannik, tassani aalajangersagaqarmat.

Kalaallit Nunaanni aqqusinertigut angallannermut inatsimmik, aamma Kalaallit Nunaanni qamutit iluarsartuunnerat pisatsersuutaallu pillugit nalunaarummik allannguinnissaaq pisariaqarsinnaavoq, inatsit eqqusseqqusinnginnermut tunngasoq atuukkunnaartinnera pissappat sunnerneqartussat isumaliutigisassat immikkoortoq tullermi maluginiagassaapput.

Motorcykelit eqqunneqaqqusaannginnerat sananeqaqqusaannginnerallu pillugu Kalaallit Nunaanni inatsimmik atuukkunnaartitsinissaaq (allannguinnissarluunniit) Namminersorneq pillugu inatsimmik allannguinnissamik pisariaqartitsilersinnaavoq. Biilnik snescooterinillu eqqussinermi akitsuutit atuuttut assigalugit, motorcykelinik eqqussinermi akitsuusiinissap nassataanik, Inatsisartut inatsisaata nioqutissanik eqqussuinermit akitsuutinut tunngasup allanngortinnissaa pissusissamisuussaaq.

Aningaasaqarnikkut allaffissornikkullu kingunerisassai

Siunnersuut pisortanut toqqaannartumik aningaasartuuteqarnerunermik nassataqassanngitsoq, kisiannili nunami maani motorcykelit amerlippata qamutit motorillit akileraarutaannik isertitat annertusinerannik nassataqassasoq, siunnersuuteqartut aalajangiussassatut siunnersuumminni patsisitut oqaatigaat. Motorcykelit ukiumut qamutinut motorilinnut akileraarusuinermit akiliutaat 3.540 kr.-iuvoq.

Inatsisip motorcykelit eqqunneqaqqusaannginnerannut tunngasup atuukkunnaartinneqarpat, eqqussinermi akitsuutinik pilersitsinissaaq pissusissamisuussasoq siunnersuuteqartut oqaatigaat. Taannalu ataasiakkaat akitsuusernerisigut pisinnaavoq (snescooterinut akitsuusersueriaaseq atuuttoq assigalugu), imaluunniit nalitussuseq malillugu akitsuusersuinikkut (biilnut akitsuusersueriaaseq atuuttoq assigalugu) ilusilerneqarsinnaavoq.

Inatsisinut Ataatsimiititaliap eqqussinermi akitsuusersuineq pillugu apeqqummut tunngatillugu maluginiarpaa, nalitussuseq tunngavigalugu akitsuusersuinissaaq, § 37 aallaavigalugu apeqquteqaammut (taamani § 36 aallaavigalugu apeqquteqaat) taamani Naalakkersuisuusut 2006-imi akissuteqaamminni orniginartillugu isumaqartut, motorcykelit

assigiinngitsut biilitulli nalitussutsikkut annertuumik nikerarneri patsisigalugu, eqqunneqaqqusaannginnerat atuukkunnaassappat, nalitussuseq aallaavigalugu akitsuusersuinissaq atorneqalertariaqartoq, ataasiakkaatut akitsuusersuineq atornagu. Massakkut Naalakkersuisuusut apeqqummut akissutaat allaasinnaasoq, Inatsisinut Ataatsimiititaliap soorunami nalunngilaa. Motorip qanoq sakkortutigisinnaaneraniq allatigullu killiliisoqassappat, tamanna naleqassutsikkut assigiinngissutsinik killiliissasoq ilimanarsinnaavoq, taamaattumik ataasiakkaatut akitsuusersuinermit naleqqiullugu, nalitussuseq aallaavigalugu akitsuusersuinissaq qinissallugu pitsaanerussanersoq nalorninarsissasoq Inatsisinut Ataatsimiititaliap maluginiarpa.

” Naalakkersuisut isumaqarput siunnersuut malissagaanni, siunnersuuteqartup ilimagisaanit, annertunerusumik allaffissornikkut suliakkersuutaanissa ilimagalugu”. Akissuteqarlutik oqaaseqaatiminni Naalakkersuisut oqaatigaat.

Inatsisinut Ataatsimiititaliap tassunga tunngatillugu maluginiarpa, inatsisip 14. maj 1980-imeersup motorcykelit eqqunneqaqqusaannginnerat sananeqaqqusaannginnerallu pillugu Kalaallit Nunaannut inatsit atorunnaartinnissaa allanngortinnissaaluunniit, Namminersorluni oqartussanut allaffissornikkut annertuumik sunniuteqarnissaa ilimaginagu, siunnersuuteqartut oqaatigigaluarat, inatsit Naalagaaffimmi inatsisaammat. Taamaattorli atuukkunnaartitsinissaq allannguissarluunniit pillugu danskit Naalakkersuisuinik isumaqatigiinniuteqarnissaq pisariaqassasoq, siunnersuuteqartut oqaatigaat, taamalu aamma Kalaallit Nunaanni aqqusinertigut angallannermit inatsimmik allannguinnissaq Naalakkersuisunit eqqusseqqusinnginneq atuukkunnaartinneqarpat pisariaqarsorisaat pillugu. Aamma siunnersuutip toqqaannangitsumik malittuanik Inatsisartut inatsisaanik eqquusuinermit akitsuutinut tunngasumi atuuttumi allannguinnissaq anguniarlugu siunnersuummik suliaqarnissaq pisariaqassaaq, motorcykelinik eqquusuinermit akitsuusiinnissaq anguniarlugu.

Siunnersuuteqartut naatsorsuutigaat, siunnersuutip atuutilernissaa anguniarlugu allaffissornikkut suliaat tamarmiusut (danskit Naalakkersuisuinik isumaqatigiinniuteqarnerit, Inatsisartut inatsisaanik eqquusuinermit akitsuutinut tunngasumi allannguutissanik siunnersuutinik suliaqarneq nutserinerlu, tusarniaanermik ingerlatsineq il.il.) katillugit ukiup affaa inorlugu piffissamik atuiffiussasut, atorfilittanik amerlanerusunik atuinani siunnersuut atortuulersinneqarsinnaassasoq.

Siunnersuuteqartut kingunerisassanik naliliinerat Inatsisinut Ataatsimiititaliap piviusorsiorlutut nalileraluarlugu siunnersuutilli allaffissornikkut timitalernissaa siunertarlugu piareersarlugu suliarineranut ukiup affaa naammannersoq qularaa, kisianni qularinagu piareersarlugu suliarinera ukiup ataatsip iluani pisinnaasoq. Siunnersuuteqartut ugguuna isumaqatigai, allaffissornikkut atorfilittanik amerlanerusunik atorfissaqartitsinissaq ilimaginagu, Inatsisinut Ataatsimiititaliap naliliivoq.

Naalakkersuisut naliliinermit isumaqataanngikkunik, Ataatsimiititaliamit qinnuivigineqarput siunnersuummik aappassaaneerinninnermit Naalakkersuisut akissuteqaamminni erseqqissumik tamatuminnaga nassuiaateqaqqullugit.

Eqqussuinermik inerteqquteqarnerup atuukkunnaassappat, atuukkunnaarneratigut qajassuullugit nakkutigisassat

Siunnersuuteqartut oqaatigaat eqqussuinermik inerteqquteqarnikkut pinnani angallannermi isumannaallisaaneq allatut iliuseqarluni attanneqarsinnaasoq. Siunnersuuteqartullu assersuutit tikkuarpaat:

- ukiukinnerpaaffissaliinikkut, assersuut: minnerpaamik 25-nik ukioqalersimagaanni aatsaat motorcykelinik ingerlatsisinnaaneq pisinnaassasoq
- ukiuunerani motorcykelinik ingerlatsisinnaaneq inerteqqutigalugu
- motorcykelip motoriata sakkortussusissaanik killiliinikkut, assersuut: motorcykelit 250 kubikimik sakkortussusillit, qummut killiliullugit

Naalakkersuisut Siunnersuuteqartut assigalugit isumaqarput eqqussuinermik inerteqquteqarnerup atorunnaartinneqarnerani aqqusinikkut angallannermi isumannaallisaanermut tunngatillugu assigiinngitsunik iliuseqarnissaq periarfissaasoq, siunnersuuteqartut iliuserisinnaasatut siunnersuutaat assigiinngitsut Naalakkersuisut siumungaaq akerliuffiginngilaat. Suliap ingerlateqqinnerani, minnerpaamik ukioqarfiliinermi killiliussa motorillu sakkortussusissaanik killiliussa qanoq tulluurtumik inissinneqassasut Naalakkersuisut naliliiffisariaqartutut isummerfigaat, aammalu isumannaallisaatit allat, soorlu pinngitsoorani nasarsuaqarnissaq qitimullu illersuummik atugaqarnissaq, atuutilernissaat aamma isumaliutigisariaqarput. Motorcykelinik ingerlatsisinnaanermut allagartartaarniarnermi piumasaqaatit Danmarkimi atuuttut malillugit aalajangersaasoqassanersoq erseqqissumik qulaajartariaqartoq, taamaassappallu motorcykelinik ingerlatsinermut allagartartaarniarnermi iliniartitsisuunermik suliaqarsinnaasunik peqarnersoq, piumasoqarnersoq suliassamik tigusiumasumik, Naalakkersuisut tikkuarpaat.

Kiisalu Naalakkersuisut tikkuarpaat mingutsitsineq pisinnaasoq aarlerigalugu, isummerfigissallugu tunngavissaqarsinnaasoq, soorlu aniatitat makku: pisariaqanngitsumik nipiliorneq, avatangiisinillu mingutsitsineq eqqarsaatigalugit.

Soorlu immikkoortumi Ataatsimiititaliap inassuteqaataanik imalimmi ersertoq, Inatsisinut Ataatsimiititaliaq eqqussuisinnaanermik inerteqquteqarnerup atuukkunnaartinnissaa pillugu apeqqummi avissarluatik isummertut. Kisianni eqqussuisinnaanermik inerteqquteqarneq ATUUKKUNNAASSAPPAT tassunga ilanngullugu malittuanik ajoqutit angallannermi isumannaallisaanermut tunngassutillit avatangiisimullu tunngassut pilersussat killilerniarlugit suliniutinik aallartitsinissaq Ataatsimiititaliap isumaqatigaa.

Naalagaaffiup pisortaanik (politimestereqarfillu) oqallisiginninnerit tunngavigalugit, oqartussanillu attuumassutilinnik tusarniaareernikkut il.il. suut suliniutit tulluartuussanersut aalajangerneqassapput.

Isumaliutinut tapiissutit – pisariaqartitat periarfissallu nassuiaatigalugit – ajornartorsiutit uku pillugit Ataatsimiititaliaq imak oqaaseqassaaq:

Ukiukinnerpaaffissaliineq:

Kalaallit Nunaanni aqqusinikkut angallannermut inatsisip § 13-iata malittuaniippoq, motorcykelinik ingerlatsisoq motorcykelinik ingerlatsisinnaanermut allagartaq uppersaat pigissagaa piunasaqaataasoq, aammalu ingerlatsisinnaanermut allagartaq uppersaat 18-inik ukioqalereernikut pissarsiarineqarsinnaasoq.

Motorcykelinik ingerlatsisinnaanermi ukiukinnerpaaffissatut killiliussap qaffannissaa pisariaqarsorigaanni, taava Kalaallit Nunaanni aqqusinertigut angallannermut inatsisip allanngortinnissaa piunasaqaataassaaq.

Ataatsimiititaliap maluginiarpaa, Danmarkimi ukiukinnerpaaffissaliineq marloqiusaasoq, motorcykelinut mikinernut (34 hk-nik sakkukinnernut) ukiukinnerpaaffiliineq ataaseq motorcykelinullu anginernut (34 hk-nik sakkortunernut) killiliussaq alla. Motorcykelinik ingerlatsisinnaanermut allagartaq uppersaat 18-it. Inorlugit ukiulinni pissarsiarineqarsinnaanngilaq. 21-nik. ukiulik motorcykelinut ingerlatsisinnaanermut allagartamik uppersaammik motorcykelinut mikinernut anginernulluunniit pissarsisinaavoq. 21-nik. ukiullit ukiuni pingasuni motorcykelinut mikinernut ingerlatsisinnaanermut allagartaminnik uppersaammik peqareersut motorcykelinik anginernik ingerlatsisinaapput. 21-it. Inorlugit ukiullit taamaallaat motorcykelinut mikinernut ingerlatsisinnaanermut allagartamik uppersaammik pissarsisinaapput. Taamaattorli 21-it inorlugit ukiulik ukiut marluk mikinernut ingerlatsisinnaanermut allagartamik uppersaammik peqareernikoq motorcykelinut anginernut ingerlatsisinnaanermut allagartamik uppersaammik pissarsisinaavoq.

Isumannaallisaanermut atortut:

Nasarsuaq:

Kalaallit nunaanni aqqusinertigut angallannermut inatsimmi § 40-up. Malittuaniippoq, motorcykelinik ingerlatsisup ingerlanermi nasarsuarmik ungersorlugu atugaqassasoq. Usiagaqassagaanni usiagaq tallimanik sinnerlugilluunniit ukiulik taamatuttaaq nasarsuarmik ungersorlugu atugaqassaaq. Ingerlanermi usiagaqassagaanni usiakkap nasarsuarmik ungersorlugu atugaqarnissaanik ingerlatsisoq akisussaavoq, usiagaq 15-it inorlugit ukioqarpat.

Qitequt isumannaallisaat meeqqallu issiaviat:

Kalaallit Nunaanni aqqusinikkut angallannermut inatsisip § 39a-p. malittuaniippoq, Kalaallit Nunaanni aqqusinikkut angallannermut inatsit naapertorlugu qitequt isumannaallisaat pinngitsoorani atorneqassasoq motorcykelip issiavia taamaattumik peqarpat. usiassagaanni usiakkap qiteqummik isumannaallisaammik atuinissaa, ingerlatitsisup akisussaaffigaa usiagaq 15-it. Inorlugit ukioqarpat. Meeqqat pingasunik ukiulinniit arfineq marlunnik ukiulinnut, meeqqat issiavianni issiasinnaapput qiteqummut taarsiullugu, meeqqallu pingasut inorlugit ukiullit pinngitsooratik meeqqat issiavianni issiassapput.

Atisat illersuutillit qaleruarlu qitimut illersuut allallu:

Qaleruap qitimut illersuutip sakissamullu illersuutip imaluunniit atisat illersuutillit immikkut ittut (kamippaat, aqqatit, qarliit kavaajjarlu) aqqunarluni perlataarnissamut illersuutaasinnaasut pinngitsoorani atorneqarnissanik, Kalaallit Nunaanni aqqusinikkut angallannermut inatsimmi, malittarisassaqqanngilaq.

Ukiup qanoq ilinerata killiliinera:

Ukiup kaajallannerani piffissami aalajangersimasumi angallannermut inatsimmi motorcykelinik ingerlatsisinnaanermik inerteqqusiisumik aalajangersakkamik imaluunniit angallannermut inatsisini allani aalajangersakkanik (Inatsisinut Ataatsimiititaliap ilisimasai naapertorlugit) peqanngilaq.

Siunnersuuteqartut oqaaseqaatigisaattut, aqquusernit quasarnanni motorcykelinik ingerlaneq angallannermi isumannaatsuunermut annertuumik ulorianartorsiortitsinera pissutigalugu isumaliutigineqarsinnaasoq, ukiuunerani ingerlatsisinnaaneq inerteqqutiginnissaa pisariaqarluni.

Assakaasunik quaannaveeqqutilinnik atuilluni quasartumi angalaneq ajutoorsinnaanermik millisitsisarpoq, taamaattumik isumaliutinut ilaasariaqarpoq motorcykelit assakaasunik quaannaveeqqutilinnik pissarsisoqarsinnaammat. Quaannaveeqquserluni motorcykelinik angalaneq inerteqqutaanngilaq, taamaattorli Kalaallit Nunaanni qamutit iluarsartuunnerat pisatsersuutaallu pillugit nalunaarut malillugu piffissami 1. majimiit 30. septemberip tungaanut quaannaveeqqutit atoqqusaanngillat.

Ukiuunerani motorcykelinik ingerlatsisinnaanerup inerteqqutiginnissaa pisariaqarsorineqarpat, peqquutissaqarpoq maluginiassallugu nunap ilaani aasareersoq aqquusernit apummik sermimillu qalleqqasinnaammata suli quasarlutik. Assersuutigalugu piffissami 1. oktoberimiit 1. majip tungaanut motorcykelinik ingerlatsisinnaanermik inerteqquteqarneq, ajutoorsinnaanerup pinaveersaartinnissaa eqqanaarniaraanni, naammannersoq qularnarpoq.

Isumannaallisaanermi maligassat ilaat:

Kalaallit Nunaanni angallannermut inatsimmi motorcykelinik ingerlatsinermi isumannaatsuunermut pingaarutilinnik aalajangersakkanik allanik aalajangiussanik peqarpoq.

Taakkununga ilaasoq eqqaaneqarsinnaavoq, Kalaallit Nunaanni aqqusinikkut angallannermut inatsisip § 39-at malillugu motorcykelip sananeqaataa naapertorlugu usiarsinnaasat sinnerlugit usiaasoqaaqusaanngitsoq.

Aamma eqqaaneqassaaq, Kalaallit nunaanni aqqusinikkut angallannermut inatsisip § 29-at malillugu, qamutinik ingerlanermi sukkassuseq tamatigut pissutsit naapertuutigalugit aaqinneqarsimassasoq pingaartumik allanik navianartorsiortitsinninnissaaq sianigineqassalluni, ingerlatitsisullu qamummik nakkutiginnissinnaaneraniit sukkannerusumik ingerlasoqassanngilaq. Qamutinik ingerlasut pingaartumik pissutsit naapertuutigalugit sukkalisaarnaveersaassapput ingerlavimmi masattumi quasartumi orsorpallittumiluunniit. Paragraffip nassataasa ilaani ippoq aqqusinertigut aalajangersimasutigut ingerlanermi sukkassusermik killileeqqusissuutinik malittarisassaqarmat, taamalu kommunini illoqarfinnilu aalajangersimasuni piffinnilu ataasiakkaani arlaqartuni (nalinginnaasumik 40 km/t ataasiakkaatigullu 60 km/t).

Ingerlatitsisinnaanermut allagartaq:

Taaneqareersutut, Kalaallit nunaanni qamutini angallannermut inatsisip § 13-ia malillugu motorcykelinik ingerlatsissagaanni, motorcykelinik ingerlatsisinnaanermut allagartaq uppersaat piginnissaa piimasaqaataasoq.

Kalaallit nunaanni politimesteri nalunaarummik motorcykelinik ingerlatsisinnaanermut allagartat uppersaatit pillugit atsiugaqarnikuvoq: Politiinit nalunaarut nr. 787 18. oktober 1999-imeersoq motorcykelinik ingerlatsisinnaanermut allagartanut uppersaatitut tunngasoq. Tassani ersippoq, motorcykelinut ingerlatsisinnaanermut allagartat uppersaatit Kalaallit nunaanni sumiluunniit pissarsiarineqarsinnaasut, taamaallaat kommunit/toqqat Ivittuut, Avanersuaq Ittoqqortoormiillu pinnagit.

Qinnuteqartup teorimik ingerlatsinermillu misilitsinnikkut uppersassavaa naammattumik ingerlatsisinnaanermut piginnaasaqarluni, naapertuuttumillu qamut taassumalu passunnissaa ilisimasaqarfigalugu kiisalu aamma Kalaallit nunaanni aqqusinertigut angallannermut inatsisit maleruarsinnaallugit.

Politiit akuerisaannik inummik ilitersuisoqarluni nakkutigineqarlunilu aatsaat sungiusarluni ingerlatsineq misilerarneqarsinnaavoq. Akuersissut nalinginnaasutut, imaluunniit immikkut ataasiakkaatut akuersissutitut tunniunneqarsinnaavoq.

Avatangiisinik mingutsitsineq:

Nipiliorneq:

Landsråðip eqqaaneqareersutut Kalaallit Nunaannut motorcykelinik eqquuinerimik inerteqquteqalernissaq siunertaralugu Naalagaaffimmi oqartussanut aalajangersakkamik pilersitseqqullugit inassuteqarneranut patsisinut akornutaasumik nipiliorneq ilaammat.

Kalaallit Nunaanni qamutit iluarsartuunnerat pisattersuutaallu pillugit nalunaarummi § 27-at, naleqqiuguk § 16-imi aalajangersagaqarpoq, motorcykelip motoria imak iluarsartuunneqarsimassasoq aserfallattaalinearunilu, pisariaqanngitsumik akornutaasumik nipiliorani. Taamatullu motorip pujoorfia nipaallisaammik pilerneqarsimassaaq.

Taaneqartut saniatigut (Ataatsimiititaliap ilisimasai naapertorlugit) Kalaallit Nunaanni aqqusinikkut angallannermut inatsimmi, akornutaasumik nipiliornermut killiliinissamik imaqtartunik aalajangersakkamik peqanngilaq, ataani killiliussat.

Ataatsimiititaliap maluginiarpaa, Danmarkimi motorcykelinut tunngatillugu nipiliornermut killiliussatut aalajangersakkat (kapitali 9 malitassami nr. 97/24/EF-i assigalugu):

- Motorcykelinut 80 kubik tikillugu angissusilinnut tunngatillugu nipiliornermi killiliussaq 75 decibeliuvoq.
- Motorcykelinut 80 kubikimiit 175 kubikisut angitigisunut tunngatillugu nipiliornermi killiliussaq 77 decibeliuvoq.
- Motorcykelinut 175 kubikimiit anginerusunut tunngatillugu nipiliornermi killiliussaq 80 decibeliuvoq.

Aniatitsineq/silaannarmik mingutsitsineq:

Kalaallit Nunaanni qamutit iluarsartuunnerat pisatsersuutaallu pillugit nalunaarummi § 27-mi, naleqqiuguk § 16-imi aalajangersagaq malillugu motorcykelip motoria imak iluarsartuunneqassaaq aserfallatsaalineqarlunilu, pisariaqanngitsumik pujuliussanani.

Taaneqartut saniatigut (Ataatsimiititaliap ilisimasai naapertorlugit) Kalaallit Nunaanni aqqusinikkut angallannermut inatsimmi, motorcykelit silaannarmik mingutsitsinerannik killiliinissaq siunertaralugu aalajangersakkamik peqanngilaq, ataani killiliussat.

Ataatsimiititaliap maluginiarpa, Danmarkimi motorcykelit aniatitaannut tunngasumik killiliussanik aalajangersagaqartoq, (malitassaq 97/24/EF malitassamik uuminnga allanngugaq 2003/77/EF-i) assigalugu.

Avatangiisimik mingutsitsineq:

Avatangiisimik mingutsitsinermut tunngatillugu maluginiagassaassaaq, issittumi pinngortitami naasoqarneq innarlerneqarluni arriitsumik imminut mamitsinniartarmat. Taamaattumik isumaliutigisariaqarpoq nunaannarmi ingerlatsisinnaanerup inerteqqutiginnissaa, imatut motorcykelinik aqqusinertigut taamaallaat (imaluunniit ingerlaarfissiani immikkut sanaani) ingerlatsisinnaaneq akuerisaalluni.

Inatsisinut Ataatsimiititaliap inassuteqaataa

Siunnersuut Ataatsimiititaliami amerlanerussuteqartut Inuit Ataqtigiit Demokratitillu atortuulersinneqarnissaa **inassutigaat**, aqqusinikkut angallannermi inatsisit politiillu angallattunik nakkutilliinerisigut, angallannermi isumannaatsuunissaaq eqquusuineramik inerteqquteqarnermut patsisigitinneqartoq, ingerlanneqarsinnaammat amerlanerussuteqartut malugimmassuk inerteqquteqarneq ullutsinnut tulluanngitsoq.

Siunnersuut Ataatsimiititaliami ikinnerussuteqartut Siumut itigartitsissutigineqarnissaa **inassutigaat**, ikinnerussuteqartut maluginiarmassuk:

“1980-imi motorcykelinik eqqusseqqusiinnaanerup tunngaviisa ilagaat aqqusinermi mianersugaalliernerit annertuneri, tassa pingaartumik inoqatinut annertuumik ulorianartorsiortitsisarneq Siumumit pingaartipparput inuit aqqusinermi toqqisisimasumik ingerlaarsinnaanerat.

Nalunngilluinnarparput motorcykelit pingaartumik inuusuttunut soqutiginarluinnartuusut, kisianni Siumumit isumaqarpugut motorcykelit nunatsinni illoqarfinni nunaqarfinnilu aqqusinerni naaqisuni naleqqutinngitsuusut inuussutissarsiutinut atorneqarsinnaaneri annertuumik killeqarput imaluunniimmi nunatsinni taamatut atugassiaanngivillutik.

Taamaattumik siunnersuut Siumumiit tapersersinnaanagu oqaatigissavarput, nunatsinni illoqarfiit nunaqarfiillu aqqusernini sulinermut inuussutissarsiutinulluunniit atorneqarsinnaanerit naatsorsuutigineqarsinnaangimata.”

Taamak oqaaseqarluni Inatsisinut Ataatsimiititaliap siunnersuut aappasaaneerinninnissamut ingerlatippaa.

Isak Hammond,
Siulittaasoq
Inuit Ataqtigiit

Andreas Uldum
Demokraatit

Kristian Jeremiassen
Siumut

Storm Ludvigsen
Inuit Ataqtigiit

Andersine H. Kristiansen
Siumut